


REPUBLIQUE Y'UBURUNDI



IBIRO VY'UMUKURU W'IGIHUGU

**IJAMBO RISHIKIRIJWE NA NYENICUBAHIRO
PETERO NKURUNZIZA, UMUKURU W'IGIHUGU**

**KU MUSI YIPFURIZA
ABARUNDI N'ABABA MU BURUNDI**

UMWAKA MWIZA W'2013

Ngozi, igenekerezzo rya 31 kigarama 2012

**Barundi, Barundikazi,
Ncuti z'Uburundi,**

1. Umwaka w'i 2012 urarangiye, uw'i 2013 uratanguye. Turakengurukiye Imana Rugiravyose ku vyiza vyawuranze, tukaba tuyituye ngo ibandanye itumurikira mw'irangurwa ry'imigambi twateguye yo muri uyu mwaka mushasha dutanguye. Ni ihabwe icubahiro kiyibereye.
2. Turipfuriye Abarundi n'ababa mu Burundi bose umwaka mwiza, umwaka w'amahoro, dushira mu ngiro icivugo tuuhariye kivuga ngo : **Dushire hamwe, twijukire ibikorwa vyo soko ry'iterambere rirama.**

**Barundi, Barundikazi,
Ncuti z'Uburundi,**

3. Uyu mwaka turiko turasozera wabereye Uburundi n'Abarundi umwaka mwiza udasanzwe, umwaka twiginyemwo yubire y'imyaka 50 iheze Uburundi bushikiriye intahe y'ukwikukira. Twararonse akaryo ko kuzirikana, gushima ivyiza vyaranze ico kiringo no kunegura amabi Uburundi n'Abarundi twagiye turacamwo, bica bitubera intango nshasha.
4. Uko twahimbaje iyo yubire vyari bifise ico vyisangije. Ica mbere cigaragaza ni uko Abarundi bakuye amaboko mu mpuzu bagakora ibikorwa biranga koko ko twikukiye. Ivyo vyagaragajwe no gufata ingingo yo guhinduka mu kwubaka ivyo kera bahora bazera kuri Leta no ku bo bita abagiraneza. Na vyo ni nk'amashure, amavuriro, kaminuza, ibitaro, ibiro vy'indongozi, amazu y'amana, amahoteri, ibibuga vy'inkino vya kijambere, amahinguriro, n'ibindi. Vyose hamwe bikaba bishika **500**.
Aha ntidushizemwo ko hafi umutumba wose wiybakiye ikimenyetso c'intahe y'ukwikukira.
5. Turavye ivyo biciye, dusanga ari amafaranga arenga imiriyaridi mirongo umunani (**80**). Turabakeje. Vyabonetse ko bagize urunani rw'intamenwa, mu gushira mu ngiro iragi ry'incungu y'ukwikukira Umuganwa Ludoviko Rwagasore yadusigiye , ridusaba kugira ubumwe bugaragarira mu bikorwa vyo soko ry'iterambere rirama.

6. Ibi kandi vyashobotse kubera uyu mwaka indongozi zagendeye cane abanyagihugu kurusha iyindi myaka, basangira ibikorwa n'ijambo, mu ntumbero y'ukwegereza ubutegetsi abanyagihugu.
7. Duhindukire rero, twibaze duti : « Mbega iyo umurindi twabikoranye uba ari wo waturanze kuva twikukira, ubu iterambere riba ringana gute mu Burundi ?». Reka rero umwanya twataye tuwurihe kwiruka !
8. Ni co gituma dushaka twibukanye ko mu guhimbaza yubile twasezeranye ko buri ku wa mbere Mukakaro, aho tuba duhimbaza intahe y'ukwikukira, bamwe bose, yaba umuryango ubishoboye, ishirahamwe, umutumba, ikomine, intara, mbere no ku rwego rw'ighugu, bohora bawuhimbaza mu kwinjira canke mu kwigina ikintu gishasha bazoba baranguye muri uwo mwaka. Muzoheza murabe ingene Uburundi butera imbere mu kanya isase.
9. Ica kabiri caranze uwu mwaka wa yubire ni ubushimwe butari buke n'ibibanza vy'iteka Abarundi bagiye bararonka kubera ubukerebutsi no kugaragaza umutima wo gukunda igihugu. Ni mwibuke namwe ikibanza ca mbere mw'isi Uburundi bwatahukanye mw'ihayanishwa ry'akaranga n'ukurata igihugu ; iteka Uburundi buheruka gutterwa mu kwitwa Ambassadeur(Umuserukizi) w'iterambere muri Afrika, bivanye n'uko hakozwe utwigoro twinshi two guhindura ibintu mu gihe gito kandi mu bihe bitoroshe, Umushikiranji w'ubutunzi wacu akaharonkera nawe izina rya Ambassadeur w'iterambere muri Afrika afise umwitwarariko munini ku Burundi.
10. Twibukanye kandi ko Uburundi bwaronse ikibanza ca gatanu kw'isi mubihugu icumi vyakoze vyinshi vyiza mu guhindura ibintu, kikaba ari co gihigu conyene co muri Afrika kiri kuri urwo rutonde.
11. Uburundi kandi bwatahukanye ikibanza **c'indwi** kw'isi n'ica **kane** muri Afrika mu vyo kworohereza abashinga imitahe; n'ikibanza ca kabiri muri Afrika yo mu buseruko mu vyo kurwanya igiturire.

12. Ni muri uwu mwaka kandi wa Yubile Prezida Buyoya yagenywe ngo aserukire Ishirahamwe ry'Ubumwe bwa Afrika mu karere ka Afrika y'uburengero, na ryo rikaba ari iteka ku Burundi.
13. Ntitwokwibagira ko mu banonotsi, abakina Taekwondo, Judo, na Karate batsindiye ikibanza ca mbere mu karere, urunani rwabo rugatsindira ikibanza ca kabiri muri Afrika. Umurwi w'umupira w'amaboko ukinirwa ku musenyi nawo uca utahukana ikibanza ca mbere muri Afrika.

Aha ntituvuze umunonotsi Francine NDAYISABA yatangaje isi mu gushika mu gice ca nyuma c'ihiganwa ry'abanonotsi « Jeux Olympiques ».

14. Mu mahiganwa y'akaranga, umuririmvyi Emérence NIWIZERE ni we yatahukanye intsinzi muri Afrika, maze Leilla NDABIRABE nawe atwara agashimwe ka mbere mu bigeme b'akaranga mw'ihiganwa ry'abanyaafrika i Buraya.
15. Hagati aho, umumenyeshamakuru Audace MAKADO wo muri Radio Isanganiro nawe yabaye uwa **mbere** mw'ihiganwa ryabereye mw'ishirahamwe COMESA mu gutunganya ikiganiro catumye atsinda abo bahiganwa bose.
16. Natwe nyene ntitwiyyibagire, kuko ka Mukuru w'igihugu twaronse ubushimwe, kamwe kitiriwe Akarorero k'Indongozi Nziza muri Afrika, twahawe n'ishirahamwe MAMTA ryo mu Buhindi, akandi twahawe n'Ishirahamwe Mpuzamakungu ONU ku ruhara twagize mu kurwanya indwara ya malariya.
17. Murumva ko ari umwaka waranzwe no gusayangana kw'Uburundi mu makungu, umwakaka koko. Turakeje rero abo bose batewe iryo teka bakaritera igihugu cacu. Ni ikimenyetso c'umwizerwa kazozza keza.

**Barundi, Barundikazi,
Ncuti z'Uburundi,**

18. Ikindi kidasanzwe caranze Yubire, ni igikorwa ciswe » Imiryângó yûgûruye», aho Ubushikiranganji bwose n'ibisata bitari bike vya Leta, nk'umurwi ujejwe gutatura amatati yamatongo n'ayandi matungo, Radiyo Tereviziyo vy'igihugu, igisirikare c'igihugu, igipolisi c'igihugu,... berekana ivyabaranze kuva twikukira, ibikorwa bakora ubu, ingorane bafise, maze bagaha akaryo umuntu wese abishatse gushikaho, akabaza canke akagira ico aterereye.
19. Ivyo vyaratanzé ingendo nshasha yo gukorera ku mugaragaro no kuronka intererano y'iviyiyumviro, kugira ngo imirimo igende neza gusumba mu gukosora ahari utunenge.
20. Ikindi caranze ihmibazwa rya yubire, ni urugero rudasanzwe abashitsi bo mu bindibihugu bashitseko mu kuza kwifatanya na twe. Intumwa z'ibihugu birenga **45** zirimwo n'Abakuru b'ibihugu **6** zari zahishikiye kudukeza kuri iyi ntahe y'ukwikukira. Turongeye kubakengurukira bimwe bivuye ku mutima.
21. Twariginanye rero, turatamba turatarika, turinjira inyubakwa nyinshi, turikeza ko dushoboye. Turakengurukiye rero abanyagihugu bose ku kuntu bitanze muri urwo rubanza rudasanzwe.
22. Turashimiye bidasanzwe abari bagize umurwi wo gutegura no kurongora ibirori vy'ihimbazwa rya yubire ku bwira, ubwitonzi n'ukwitanga vyabaranze. Barerekanye ko bakora koko ico bakunze, bakora nk'abikorera.
Tuboneyeho rero akaryo ko gutangaza icese ko dusozereye umwaka wa yubire, ariko tukazoguma twinovora ivyo idushikanyeko bikatubera intango nshasha n'ingendo nshasha ku bikwirikira.
23. Muri rusangi, turavye ivyaranguwe, twarabonye ko dushoboye vyinshi tutabanje kuzera inze, twikoze cane cane ku bwenge no ku maboko. Tuvuge rero tuti:
 - Twaratsinze intwaro ya bakavamahanga, dusubizwa ijambo, aba ari twebwe tubazwa ivy'igihugu cacu;

- Twaratsinze ingeso mbi y'amacakubiri dutsindira ubumwe no gufatana mu nda ;
 - Twaratsinze intwarz y'igikenye dutsindira intwarz ya demokarasi, Abarundi baba ari bo bigenera indongozi biciye mu matora ;
 - Twaratsinze kwama turara rubunda dutsindira amahoro n'umutekano mu gihugu cose ;
 - Twaratsinze kuniganwa ijambo, dutsindira ubwigenge bwo guserura iviyumviro vyacu, agateka ka zina muntu nako karubahirizwa ;
 - Twaratsinze ingeso mbi yo kwikengera yatuma twama duteze amashi, dutsindira kwikora ku bwenge n'inguvu Imana yaduhaye, tugaragaza ko dushoboye.
24. Urugamba rwo kurwanya ubukene, tigateza imbere igihugu, turarukomeza, kandi na rwo nyene, dufatanye mu nda, nta nkeka tuzorutsinda nk'izindi; na cane cane ko dufise intumbero itomoye muri ya migambi ibiri mikuru mikuru: Uwo kurwanya ubukene n'uwingene twipfuza ko igihugu cacu coba kimeze mu mwaka w'i 2025.
- Barundi, Barundikazi,
Ncuti z'Uburundi,**
25. Iyi ntambwe tugezeko irakomeye, kuko ituma amakungu atwizera. Mwariboneye ingene ibihugu-bigenzi n'amashirahamwe mpuzamakungu asanzwe adufasha mw'irangurwa ry'imigambi y'iterambere bitavye akamo twabateye mu kutwemerera uburyo bwo kurangura wa mugambi wa kabiri wo kurwanya ubukene.
26. Ayo makungu yitavye akamo twayateye cane cane kuko abona igihugu cacu kiri ku murongo mwiza w'intwarz ibereye, gitekanye, amahoro atsimbataye, umutekano nawo uteramiwe na bose. Nkako, mwarabonye ko hari uturwi tw'inkozi z'ikibi twari twagerageje guhungabanya umutekano, hakaba iterabwoba ngo intambara igiye kureta. Ariko, kubera ubukerebutsi n'ugukorana kwiza hagati y'abajejwe intwarz, abajejwe umutekano, abajejwe

ubutungane n'abanyagihugu, ibikorwa vy'izo nkozi z'ikibi vyamaze umwanya urume rumara.

27. Tuboneyeho akaryo ko gushimira bimwe bivuye ku mutima abo bose bafashije kurwanya utwo turwi, tunasubira gukebura intahaha ngo zimenye ko ivyari imagera vyageruye, ntizitiranye ibihe, kuko ata ntambara igisubîra aha iwacu. Turabisubiyemwo, n'uzogerageza ntazoducana umutaru ngo atere intambwe.
28. Abandi bagizi ba nabi bagwanijwe kandi bagahashwa, ni imigwi y'abasuma biba cane cane mu bisagara, kenshi na bo nyene bakoresheje inkoho. Imigwi nk'iyo ishiká kuri 43 yarasambuwe.
29. Ububisha tubandanya guhasha ni ubwicanyi bufatiye ku matongo, ku kwihorahorana, tutibagiye n'abantu b'ibimenabanga bataye ubuntu bakiyadukiza gufata abana, abigeme n'abakenyezi ku nguvu.
30. Dusavye abajejwe ubutungane, abajejwe umutekano n'umurwi w'ighihu wigenga ujejwe ivy'agateka ka zina muntu ngo bongereze inguvu mu gukora neza, maze ako karanda karanduranwe n'imizi.
31. Tuboneyeho akaryo ko gushima igikorwa co gutegura itegeko ritomora akarangamutima k'abacamanza, kuko bizotuma utunenge tumwe tumwe twibonekeza muri ico gisata c'ubutungane duhera.
32. Duhiriwe duhishije, kuko harubatswe kandi haragurwa amasentare y'intango n'amasentare y'ighihu kugira ngo ubutungane bwegere abanyagihugu, hongera haratangwa amapikipiki ku ma sentare y'intango atari make.
33. Ariko rero, ikituraje ishinga si uko abantu boherera mu munyororo, ahubwo ni uko bokwihanura bakareka gukora ikibi. Ni co gituma mwumvise ko twafashe ingingo zitari nke zatumye abapfungwa bashika ibihumbi indwi **(7.000)** batezurirwa.

**Barundi, Barundikazi,
Ncuti z'Uburundi,**

34. Amahoro n'umutekano dufise ni vyo vyatumye Abarundi isinzi bari barahungiye hanze y'igihugu bahunguka. Uyu mwaka tukaba twagiye turakira abatari bake, na burya ikambi z'impunzi z'Abarundi zose zari muri Tanzaniya zugawe.
35. Eka na benshi bari bahungiye hagati mu gihugu barasubkiye ku mitumba y'amavukiro, abandi bahitamwo kugura na bene amatongo aho ama site yari ari.
36. Turakeje cane abumvise akamo bakagashira mu ngiro n'abariko baragashira mu ngiro ubu.

Aha twovuga dushima cane abari bahungiye i Kiremba, i Gakere, i Sanzu mu Ruyigi, i Ruvumvu muri Bubanza, abahoze mu masite atari make yo mu ntara za Muramvya na kayanza, abari bahungiye i Buhinyuza n'ab'i Buganda. Twizeye ko n'abandi bariko baritegura.

37. Turaneguye cane inyoshambi zibahatira kuguma mu ma site y'impunzi ngo iyo bavuye nta mutekano uhari kandi barimirayo, bafashanya imanza n'abasigaye ku mitumba, bashingiranira canke n'amatongo yabo afatanye na site barimwo.
38. Turashima igikorwa umurwi CNTB ujejwe gutatura amatati yamatongo n'ayandi matungo uriko urakora n'ingene ukirangura. Nkako, uyu mwaka wonyene warashoboye gutunganiriza abarenga **3.500**. Biragaragara kandi ko abanyagihugu bawiyumvamwo, kuko abawituye uyu mwaka barenga **3.300**.
39. Abakora muri CNTB rero ni bakomere kw'ibanga, barangure umurimo wabo atawe barenganje, kandi badakebaguzwa kubera ababavuga uko batari.
40. Turabakeje kandi ku biganiro bamaze imisi batanga, gurtyo uwo wese afise akarigangamuhogo akabaza, akaronka umuco; uwutanga impanuro zubaka nawe zikakirwa, kandi zigakorerwako.

**Barundi, Barundikazi,
Ncuti z'Uburundi,**

41. Mu burimyi n'ubworozi, Leta yarafashe ingingo zitari nke kugira umwimbu wiyongére. Ni muri iyo ntumbero hatanzwe inka za kijambere zirenga **5.500**, haragazurwa n'imyonga ingana na hegitari **2.000**.
42. Hariko harakwiragizwa kandi imivyaro y'ibitoki ishika **75.000**, imbuto z'ibigori zingana na toni **50**, amatoni ashika **300** y'imbuto z'umuceri, ibikotikoti vy'imyumbati birinda ya ndwara ya mozayike birenga itoni **1.500**, amatoni yababa **200** y"ibiraya, n'imivyaro y'ibigazi ishika **116.000**. Hariko haraterwa kandi ivyamwa birenga imiliyonu icumi (**10.000.000**).
43. Duheruka kandi gushiraho ikigega kizojamwo amafaranga y'amarundi arenga **imiliyaridi 23** yo kugura umwavu w'ikizungu, ivyo bikazofasha kurwanya ubukene bw'umwavu bwama bwigaragaza mu gihe c'rima.
44. Harakoranjwe mbere inama ihuza abaserukira Leta n'abadufasha mw'iterambere ry'uburimyi, baratwemerera uburyo bungana n'amafaranga y'amarundi imiliyaridi **230** gushika mu 2017.
45. Mu gisata c'indero, Leta yarabandanije ishira mu ngiro wa mu mugambi wo kwigisha abana ku buntu mu mashure y'intango yongera iratanga ibikoresho vy'ishure bitari bike mu gusahiriza abavyeyi, n'ubu ikiriko.
46. Harubatswe amashure y'imyuga, harashirwaho ikigega c'amafaranga y'amarundi angana n'imiliyonu **170** co gufasha abahejeje amashure y'imyuga gutegura imigambi, tukaba twaremerewe imfashanyo ingana n'imiliyaridi **80** tuzohabwa n'ikigega mpuzamakungu kiraba indero, n'imiliyaridi **27** twemerewe n'ighugu ca Norvege.
Ayo yose azofasha gutorera umuti ubwinshi bw'abanyeshure mw'isomero, kwongereza ibitabu n'intebe kugira haboneke inyigisho z'akanovera.

47. Mu ntumbero ya wa mugambi wo gushikana amashure y'intango mu mwaka w'icenda, mu kibazo ca Leta co mu mwaka wa gatandatu, ibice 50% bararonse amanota asabwa yo kwinjira mu mwaka w'indwi, intonde z'ivyigwa nazo zikaba zibandanya zihinyanyurwa, turondera n'uburyo bwo kuzowushira mu ngiro.
48. Mu gisata c'amagara y'abantu, Leta yarabandanije wa mugambi wo kuvura ku buntu abana bari munsi y'imyaka itanu, abavyeyi babandanya bibarukira ku buntu mu bitaro n'amavuriro vya Leta.

Harubatswe ibitaro 3 mu Gahombo, i Giteranyi no mu Gashoho, ibindi bitaro 2 bikaba biriko birubakwa i Karusi n'i Gihofi. Harubatswe kandi n'amavuriro atari make, turabandanya n'urugamba rwo kurwanya indwara ya malariya n'ikiza sida.

Barundi, Barundikazi, Ncuti z'Uburundi,

49. Mu bijanye no gukingira ubutunzi bw'ighugu, inzego ziejwe kurwanya igituriire zarakoze ibitari bike. Zarakingiye ikigega ca Leta mu kuburizamwo amadosiye n'amasoko yari gutuma Leta ihomba amafaranga arenga imiriyaridi 10. Zarashoboye no kwinjiza ayatari make arenga imiliyoni **150**, ariko ziteze ayanarenga umuriyaridi igihe imanza zaciwe zoba ntabanduka.
50. Ikindi izo nzego zishima ni uko ubu abanyagihugu n'indongozi biboneka ko bahagurutse mu gufasha urwo rugamba. Ivyo vyigaragaza cane cane mu gitigiri c'abapolisi bakorera ku mabarabara bafatwa, tutibagiye n'abacamanza bafatwana itonga. Ibi vyatumye mbere hari na dosiye imwe bakoze ishobora gutuma Leta igaruza **imiliyaridi** zirenga **25**.
51. Ahacu rero turabakeje tunabibutsa ko wa mugambi w'intwaro ibereye no kurwanya igituriire twatanguye kuwushira mu ngiro icese, gurtyo hakaba haratanguye uruganda rwo guhinyanyura amategeko ngo dukuremwo inzitizi zose.

52. Uko rero ibiturire no kunyuruza amafaranga ya Leta bituzwa, ni ko ca kigo OBR naco gica cinjiza uburyo bwinshi mu kigega ca Leta. Ibiharuro bikaba vyerekana ko uyu mwaka hinjiye hafi imiliyaridi **523** mu gihe mu mwaka uheze hari hinjiye hafi imiliyaridi **472**. Murumva ko hariho akarusho kanini.
53. Igihugu cacu gifise ubutare butari buke, mugabo ahensi ataco bumarira Uburundi n'abarundi kiboneka, kuko bucukurwa kandi bugashorwa hadakwirikijwe amategeeko. Itegeko ribitunganya neza riheruka kwigwa mu nama nshikiranganji.
54. Ikindi kibazo twahanganye n'ubu tukiriko, ni ikijanye no kugwiza umuyagankuba, kuko ari kirumara mw'irangurwa ry'imigambi y'iterambere mu gihugu cacu. Leta iriko irubaka ingomero nshasha z'umuyagankuba ku nzusi za Mpanda, Kaburantwa na Kagunuzi, yitegurira no kwubaka izindi ku nzusi za Jiji na Murembwe.
55. Kubera biteba kuronka umuyagankuba uvuye ku ngomero, turiko turiyungunganya kugira haboneke umuyagankuba uvuye ku zuba no mu moteri zinywa ibitoro woba urasahiriza, kuko abawukeneye baguma biyongera.
56. Murazi ko dufise n'ubutare bwa Nickel bwinshi buri mu bizotuma tuva mu bukene, ariko hakaba hakenewe umuyagankuba mwinshi wo kubwimba. Uwo nawo nyene uriko uraronderwa biciye mu masezerano turiko tugiranira n'abafise imitahe n'ubuhinga.
57. Turabamenyesheje ko n'umugambi w'ibarabara ry'indarayi riduhuza n'ibihugu vya Afrika yo mu buseruko uriko uratunganywa wisunga cane ubwo butare.
58. Ubutunzi dufise si ubwo gusa, kuko amatohoza amaze gukorwa arerekana ko dufise inzahabu, ubutare bita Terres rares, coltan, cassiterite, wolframite, ibitoro, ishwagara n'ubutare bita "Fer".

59. Ubwo butare bita « Fer » rero, dusa n'uko tubwiharije mu karere, intumbero yacu kukaba ari uko bumaze gucukurwa bwohingurirwa aha iwacu nyene, hakavamwo ivyuma vya nkenerwa nk'imisumari, ama « fers à béton »,....akarere kakagurira iwacu, kuko bose bahora babikura mu bindi bihugu. Murumva rero ko imbere ari heza, dukomeze gusa umutekano, ubumwe n'amahoro, dushire hamwe inguvu n'ubwenge dukore.
60. Kugira ngo uruja n'uruza rw'abantu n'ibantu rukomere mu gihugu no mu bihugu dusangiye imbibe, harubatswe ibarabara riva ku Ruhwa rigashika i Nyamitanga (RN 5), hariko harubakwa irihuza Gitega na Ngozi (RN 15), Cankuzo na Muyinga(RN 19), Bubanza na Ndora(RN 9) n'amabarabara yitiriwe Avenue du Large na Yaranda mu gisagara ca Bujumbura, tutibagiye ibikorwa vyo gusasa amabuye mu mabarabara yo mu makomine ya Kamenge , Cibitoke na Kinama, no mu gisagara ca Ngozi. Ahensi ibikorwa bikaba vyarangiye.
61. Mu misi iza, tugiye gutangura kwubaka ibarabara riva kuri Shanike rigaca mu Gatumba rigashika ku rubibe duhana na Repuburika iharanira demokarasi ya Kongo (RN 4), hamwe n'ibarabara rihuza Nyanza Lake, Mabanda na Mugina. Turafise n'umuhango ko vuba uburyo bushobora kuboneka tukubaka ibarabara rya Nyakararo-Mwaro (RN 18) na Makebuko-Ruyigi (RN 13).
62. Mu vyerekeye kwiyunguruza hakoreshejwe indege, ishirahamwe "Air Burundi" riherutse kuronka indege.

**Barundi, Barundikazi,
Ncuti z'Uburundi,**

63. Muri uyu mwaka tugiye gutangura, tuzokwihatira cane gushira mu ngiro imigambi iri muri ca gitabu kirimwo umugambi mukuru wo kurwanya ubukene. Tukaba dusavye abanyagihugu bose kwitaba akamo ko gusohora amaboko bakore cane, nkako, iterambere ntiryizana riraronderwa.
64. Turasavye imiryango, amakomine, intara, amashirahamwe gufata ibiri muri ico gitabu bakabigira ivyabo, kuko imigambi itomoye y'iterambere ariho ibarizwa.

65. Turasavye incabwenge ziri hanze n'iziri hagati mu gihugu ngo zishire hamwe ubumenyi, zikorane n'abarwizatunga, maze intara yose izobe ifise n'imiburiburi ihinguriro mu mwaka w'2020. Ivyo guhingura ni vyinshi, vyaba ibirimwa, vyaba ibiva mu bworozi, bwaba ubuki, ibiva mw'ivu, mu mabuye, n'ibindi.
66. Ivyo bidusaba ko duhinduka, tugakorera hamwe, tukubahuka gufata ingurane mu mabanki, ariko nayo nyene yumve ko ahamagariwe guhindura ingendo, aronse amafaranga abashinga imigambi ku nyungu ibayabaye.
67. Ibi tubivuga tuvyizeye. Nkako, kubera ivyo kworohereza abashinga imitahe bitakiri agaseseshwarumuri, na cane cane kuva muri Ntwarante uyu mwaka, aho hajaho ico bita « guichet unique », igitigiri c'abashinga imitahe caraduze kirarenga ijana na mirongo ibiri (120), ku buryo uwu mwaka wonyene twaronse abababa igihumbi n'amajana atatu (1.300) bashobora gukoresha amafaranga arenga **imiliyaridi 370**. Ikinezereye kurusha rero, ni uko harimwo Abarundi benshi, bisigura ko twamaze kuhabona.
68. Kukaba nkako, twarabonye ko aho incabwenge z'imvukira zitayeho iterambere ry'aho zamuka, ibikorwa bigenda neza. Duheruka kubibona mw'isuzuma ry'ingene amakomine arushanya mu gukora, haba mu gutunganya intwaro nziza, mu gutunganya uburyo bw'amafaranga no mu kwitaho ivy'imibano no kudakumirana.. Amakomine yo mu gihugu hagati akaba ariyo yaronse amanota menshi.
69. Turasubiye gukeza Komine Busiga yabaye iya mbere. Amakomine yo mu gisagara ca Bujumbura yo ntiyakije, kuko ata n'imwe ishikana amanota 50%, mbere iyinanase ifise 36%, mu gihe hari n'izitarenza atatu kw'ijana (3%). Ni akaryo ko kwikebuka.

**Barundi, Barundikazi,
Ncuti z'Uburundi,**

70. Mu mwaka uza kandi ni ho twiteze gutanguza wa murwi wo kumenya ukuri no kurekuriranira, ibwirizwa riwugenga rikaba riri mu Nama Nshingamateka.
71. Ikindi gikorwa gikomeye kikazoba ari ico guhinyanyura amabwirizwa ajanye n'amatora, tutibagiye n'Ibwirizwa Nshingiro. Uyu mwaka turangije ukaba waranzwe no gutangura guitarira ico gikorwa.
72. Ntitwokwibagira na wa mugambi w'inyigisho zo gukunda igihugu n'uwo gutunganya gushasha ibijanye n'uruhara rw'umwe wese mu vy'umutekano.
73. Tuboneyeho akaryo ko gusubira gutera akamo abubatse ngo bakomeze ingo zabo, maze kwahukana no guharika babigire indahiro. Nimwiteho indero y'abana isa n'iyatitutse muri iyi misi, mwibuke ko, urugo ari rwo mushinge w'iterambere ry'ighugu. Dukingire rero imico myiza kama yacu.
74. Dusavye abakozi ba Leta nabo ko, aho kuja mu mayegereyegere, boja nyabuna mu nzira y'ibiganiro, bagasaba ivyo amategeko abarekurira, bakabirindirana ubuntu. Ku bwacu, ntaco tutazokora kugira umwe wese yubahirizwe, tutibagiye cane cane abanyagihugu baba bategerezwa gutunganirizwa.
75. Ariko, Leta ntizokwemera ubuki itegeka, kandi ntizoreka abanyagihugu ngo barwe mu mporero bazira abagize yegereyegere umwuga. Ni co gituma dusavye Abashikiranganji n'abarongoye ubuzi bwa Leta kwama barikanuye mu gutegekanya abasubirira abakozi barengeje urugero mu kurenga amategeko y'amayegereyegere, naburya abakeneye akazi ari benshi.
76. Turashimiye rero abo bose batajanye nyabahururu bakaguma ku mirimo, kandi ni bo benshi. Leta izobandanya ifata ingingo zikingira abashaka kuguma ku kazi. Twibuke twese ko tudakoze, n'ivyahuha vyohuhuka. Umwaka w'2013 uzoba rero igipimo gikomeye ku ndongozi mu guhagararira amategeko n'inyungu z'ighugu.

77. Imbere yo kurangiza, twashaka kumenyesha ko mu kubandanya turamira abanyagihugu, ingingo yo gukura amatagisi n'amakori ku bifungurwa bimwe bimwe izobandanya gushika ku mpeshi ku wa 30 Ruheshi 2013.
78. Tubamenyeshe kandi ko hari amabwirizwa azotuma kuva mu 2013 indongozi nkuru z'igihugu zitanga ikori ku mishahara, nayo abahembwa amafaranga atarenga ibihumbi **150**, ntibazosubira gutanga ikori ku mushahara.
79. Ku basigaye nabo nyene rikaba rigabanuwe kuva ku 35% gushika ku 30%.
Izo zose zikaba ari ingingo zizotuma haboneka akarusho mu buzima bw'abatari bake.
80. Ntitworangiza tudashimiye amakungu ku ntererano yayo yatumye igihugu cacu kigenda gitera imbere mu vy'umutekano, ubutunzi n'intwaro ibereye, tukabasaba kubandanya.
81. Turasubiriye rero kwipfuriza Abarundi n'ababa mu Burundi umwaka mushasha mwiza w'2013, muwuronkemwo ivyiza vyose mwipfuza, twese « **Dushire hamwe, twijukire ibikorwa vyo soko ry'iterambere rirama** ».

Umwaka mwiza mwese.

Imana ibahezagire, Murakoze.